

UMNO Labuan sedia terima bekas ahli kembali ke pangkuan parti

LABUAN: UMNO Bahagian Labuan tidak pernah berdendam dengan mana-mana ahlinya yang sebelum ini telah meninggalkan parti untuk menyertai parti komponen Pakatan Harapan (PH) dan kini ingin kembali semula ke pangkuan parti keramat orang Melayu itu.

Ketua UMNO Bahagian Labuan Datuk Haji Bashir Haji Alias berkata, pintu UMNO masih terbuka kepada mereka yang berhasrat untuk kembali semula ke pangkuan parti itu.

"Kita tidak menolak besar kemungkinan ramai bekas ahli UMNO akan menyertai semula setelah merasai pengalaman dan suasana yang berbeza dalam parti PH, secara jujur UMNO Labuan tidak mempraktikkan politik berdendam, pintu kita masih terbuka untuk mereka kembali ke pangkuan UMNO," katanya.

Tambahnya, walaupun ramai dalam kalangan ahli UMNO yang telah meninggalkan parti dan berhijrah ke PH ketika itu, namun semangat perpaduan ahli-ahli UMNO yang sedia ada masih kental dan terus memberikan sokongan yang cukup mantap kepada kepimpinan parti untuk sama-sama berjuang membela nasib rakyat di Wilayah Persekutuan Labuan.

"Saya ucapkan terima kasih kepada semua kepimpinan di semua peringkat dalam UMNO Bahagian Labuan termasuk ahli yang kekal setia.

"Kita akui selama 22 bulan terakhir berada di blok pembangkang tidak semudah apa yang rakyat harapkan, malah lebih banyak mengecewakan rakyat," katanya.

Bashir berkata, UMNO Labuan ketika ini lebih memfokuskan penyusunan

semula jentera dan keahlian parti agar UMNO Labuan terus relevan di mata rakyat tempatan.

"Saya turut bersyukur gabungan parti UMNO dan PAS dalam Muafakat Nasional (MN) mendapat sokongan rakyat yang agak luar biasa dan ia terbukti apabila calon MN memenangi dalam lima pilihan raya kecil termasuk yang terbaharu di Parlimen Kimanis," katanya.

Beliau berkata demikian kepada pemberita di kediamannya di Kampung Sungai Lada, baru-baru ini.

Turut hadir, Timbalan Ketua UMNO Bahagian Labuan Datuk Khalid Abd. Ghani, Setiausaha UMNO Bahagian Md Dzulfazal Abd. Manan, Ketua Puteri UMNO Bahagian Jura'adhiyah Dr. Harun dan beberapa AJK Bahagian dan Ketua-Ketua Cawangan UMNO Labuan.



KEPIMPINAN UMNO: Bashir (duduk) bersama barisan kepimpinan UMNO Bahagian Labuan di kediamannya di Kampung Sungai Lada, baru-baru ini.